

Christi Domini, & materiam eiusdem, ac vtramque simul sibi vnire; in quo casu anima est a Deo, & simul in Deo ob vnionē, non idcirco tamen generata est; quia Deus respectu eius, & si sit id a quo, & id in quo, nullo modo est id ex quo; cum ergo non explicent modum generationis formæ ipsorum, & illum, suis sophysmatibus inintelligibilem reddant, ita inintelligibilem reddunt eorum formam, & materiam, atque adeo, illam, esse veluti ens chymericum, quod non datur nisi in intellectu illud fingente.

29 Dicunt etiam alij Aristotelis defensores, quod in physica generatione generatur forma, non vt ens est, sed vt tale ens; quia, dicunt isti, natura non fertur per se in productionem eius, quod iam erat in materia, sed in id, quod nondum erat productum, quia si ens vt ens fieret, non deberet præcedere ens, atque ita ex nihilo res fieret, quod impossibile est in casu nostro; at cum non fiat ens vt ens, sed ens hoc vel illud, satis est præcedere aliquod non ens, videlicet illud, quod effici debet, licet hoc non ens vera aliud ens sit; vnde ego sic discurre: si forma Aristotelis non fit vt ens est; ergo ipsa, quatenus ipsa, non fit, quia ipsa est essentialiter ens, & vt talis non fit, aut non generatur, nec fit vt hoc vel illud ens, sed hoc vel illud ens est per illam tamquam per causam formalem, materia vtique est [si datur] hoc vel illud ens, seu fit hoc vel illud ens; vnde sequitur formam non esse ens; si secundum se præcisè sumatur, & seorsim a materia, quæ sola cum creata sit, facta est vt ens, etiam sola fit tale ens; ergo vel forma non datur, vel non generatur, sed creatur.

30 Ergo, dicent ipsi peripatetici, per me non dabitur generatio substantialis, sed ad summum mistio, siuè alteratio concedenda erit: at hoc esse non potest, quia mistum non est ex partibus homogeneis, sed etherogenicis.

Respondeo, falsam esse sequelam; quia mistio, & generatio idem sonant, & sunt; putant namque aristotelici, quod elementa mea omnium rerum prima principia, vt postquam vniuntur, siuè in compositione totius veniunt, non maneant formaliter in misto, sed solum virtualiter, quod falsum est, sunt namque vera, & realia prima principia illa ab Aristotele definita primo physicorum cap. 1. nempè illa, quæ nec ex se se vicissim sunt, nec ex alijs; & ex ipsis omnia, ipsa namque sunt ingenerabilia, & incorruptibilia, sunt enim materia prima omnium mistorū,